

Deddf Rhyddid Gwybodaeth 2000

Hawl mynediad

Daeth Deddf Rhyddid Gwybodaeth 2000 i rym ar 1 Ionawr 2005. Mae'n effeithio ar bob awdurdod cyhoeddus ac yn rhoi hawl i chi (oni bai y ceir eithriad):

- i gael gwybod os cedwir gwybodaeth
- i dderbyn yr wybodaeth honno.

Mae'r term 'awdurdod cyhoeddus' yn cynnwys y rhan fwyaf o sefydliadau ac adrannau llywodraeth yng Nghymru, Lloegr a Gogledd Iwerddon (mae gan yr Alban eu Deddf eu hunain), ac mae hefyd yn ein cynnwys ni, y rheolydd pensiynau seiliedig ar waith yn y Deyrnas Unedig.

Y Comisiynydd Gwybodaeth sy'n gyfrifol am oruchwylio'r Ddeddf (ynghyd â Deddf Diogelu Data 1998). Yn ôl y gyfraith, rhaid i ni a phob awdurdod cyhoeddus arall:

- fabwysiadu a chynnal 'cynllun cyhoeddi'
- cadarnhau neu wadu (pan ofynnir i wneud) a gedwir gwybodaeth neu beidio a
- darparu'r wybodaeth honno (neu esbonio pam na fydd yn cael ei darparu) o fewn 20 niwrnod gwaith.

Bydd y rhan fwyaf o geisiadau am wybodaeth yn rhad ac am ddim, er y gallem godi tâl ar adegau am bostio neu lungopio.

Beth yw cynllun cyhoeddi?

Prif ddiben cynllun cyhoeddi yw darparu gwybodaeth yn hwylus heb fod angen gwneud cais ysgrifenedig penodol. Mae ein cynllun cyhoeddi yn esbonio:

- y dosbarthiadau o wybodaeth yr ydym eisoes yn ei chyhoeddi neu'n bwriadu ei chyhoeddi
- sut fyddwn ni'n cyhoeddi'r wybodaeth (er enghraifft, ar ein gwefan) a
- p'un a fyddwn yn codi tâl am yr wybodaeth neu beidio.

Nid yw'n rhestr gyflawn o'n cyhoeddiadau gan ei bod yn newid a byddwn yn diweddarau cyhoeddiadau'n rheolaidd.

Mae'r Comisiynydd Gwybodaeth wedi cymeradwyo ein cynllun cyhoeddi, ac mae ar gael o'n gwefan ar www.thepensionsregulator.gov.uk/foi/publication-scheme. Mae hefyd ar gael, yn rhad ac am ddim, ar fformatau eraill – mewn print bras, Braille neu iaith arall.

Beth am wybodaeth nad yw wedi ei rhestru yn y cynllun cyhoeddi?

Ni fydd yr holl wybodaeth gofnodedig sydd gennym yn cael ei chynnwys yn ein cynllun cyhoeddi. Nid yw hyn o reidrwydd yn golygu nad yw ar gael, felly dylech wneud cais ysgrifenedig ar gyfer yr wybodaeth fyddwch ei heisiau. Gallai'r wybodaeth fod wedi ei chofnodi ar unrhyw ffurf – er enghraifft, papur, e-bost neu electronig – a gallai ddod gan unrhyw ffynhonnell, nid dim ond dogfennau a gyhoeddir gennym ni.

Os gwelwch yn dda noder

Os ydych chi eisiau gwybodaeth amdanoch chi fel unigolyn, yna'r Ddeddf Diogelu Data 1998 sy'n berthnasol, nid y Ddeddf Rhyddid Gwybodaeth. Gellir gweld y Ddeddf Diogelu Data yn www.legislation.gov.uk/ukpga/1998/29/contents.

Sut ydw i'n gofyn am wybodaeth?

- Dylech ofyn am wybodaeth yn ysgrifenedig (trwy lythyr, e-bost neu ffacs)
- Bydd angen i chi ddisgrifio'r wybodaeth yr hoffech i'n helpu ei nodi, ei chanfod a'i darparu i chi, ond nid oes rhaid i chi ddweud pam eich bod ei heisiau ac ni fyddwn yn gofyn.

Anfonwch e-bost at foi@thepensionsregulator.gov.uk neu ewch i www.thepensionsregulator.gov.uk/foi.

Gallwch hefyd gael rhagor o wybodaeth gan:

Y Comisiynydd Gwybodaeth
Swyddfa'r Comisiynydd Gwybodaeth
Wycliffe House
Water Lane
Wilmslow
Swydd Gaer
SK9 5AF

0303 123 1113

Anfonwch e-bost at casework@ico.org.uk neu ewch i www.ico.org.uk.

Beth fyddwch chi'n ei wneud gyda'm cais?

- Pan dderbyniwn eich cais, byddwn fel arfer yn ymateb o fewn 20 niwrnod gwaith
- Byddwn yn rhoi gwybod i chi a oes angen i chi dalu ffi (os oes ffi, rhaid i chi ei thalu cyn i ni anfon yr wybodaeth)
- Gan amlaf, byddwn yn cadarnhau a oes gennym yr wybodaeth ydych ei hangen neu beidio
- Byddwn yn gofyn ar ba fformat yr hoffech i ni ddarparu'r wybodaeth i chi
- Os nad oes gennym yr wybodaeth, byddwn yn rhoi gwybod i chi pwy sydd â'r wybodaeth (os gwyddom)
- Os byddwn yn penderfynu peidio darparu'r wybodaeth y gofynnoch amdani, byddwn yn esbonio pam
- Os oes unrhyw oedi, byddwn yn rhoi gwybod i chi pam ac yn dweud pryd allwch chi ddisgwyl derbyn yr wybodaeth, neu byddwn yn esbonio pam na fyddwn yn ei darparu.

Allwch chi ymatal rhag datgelu gwybodaeth?

Er bod y Ddeddf yn cefnogi polisiau cenedlaethol i foderneiddio'r llywodraeth ac annog bod yn agored, mae rhai eithriadau. Er enghraifft, efallai y byddwn yn dal gwybodaeth yn ôl ble:

- nad ydym yn cael ei rhyddhau dan ddeddfwriaeth arall neu y byddai'n ddirmyg llys i'w rhyddhau
- ei bod yn gyngor cyfreithiol
- y'i darparwyd yn gyfrinachol neu ei bod wedi ei dosbarthu fel data personol dan y Ddeddf Diogelu Data 1998
- disgwylir y bydd yn cael ei chyhoeddi yn y dyfodol
- mae eisoes ar gael i chi'n rhesymol o ffynhonnell arall, neu
- byddai'n effeithio ar unrhyw ran o'n hymchwiliadau.

Gallwn:

- wrthod ceisiadau gan unrhyw un sy'n gofyn yn fynych am yr un wybodaeth neu wybodaeth debyg iawn
- beidio rhyddhau gwybodaeth os yw cost ei rhyddhau yn fwy na £450, hyd yn oed os ydych chi'n barod i dalu costau llawn delio â'r cais (er y byddwn yn darparu gwybodaeth hyd at y gost honno), neu
- mewn rhai achosion, ni fyddwn yn dweud a oes gennym yr wybodaeth y gofynnoch amdani.

Weithiau, efallai y byddwn angen mwy nag 20 niwrnod gwaith i ddod o hyd i wybodaeth a phenderfynu a allwn ei rhyddhau. Os yw hyn yn wir, byddwn yn ymateb i chi o fewn 20 niwrnod o dderbyn eich cais i roi gwybod i chi y bydd yn cymryd mwy o amser i ni ddelio â hyn. Byddwn yn ceisio rhoi gwybod i chi pryd allwch chi ddisgwyl ymateb yn llawn.

Beth os nad wyf yn fodlon â sut y delioch â'm cais?

Gallwch ofyn am adolygiad mewnol yn ysgrifenedig (llythyr, e-bost neu ffacs) i'n hysgrifennydd corfforaethol yn Y Rheolydd Pensiynau (gweler y dudalen gefn ar gyfer manylion cyswllt).

Byddwn yn ymateb yn llawn i'ch cwyn o fewn 20 niwrnod gwaith neu'n rhoi gwybod i chi cyn gynted â phosibl os byddwn yn disgwyl y bydd yn cymryd mwy o amser na hyn.

Os ydych yn dal yn anfodlon â'n hymateb, gallwch gwyno i'r Comisiynydd Gwybodaeth (gweler tudalen 3).

Sut i gysylltu â ni

Napier House
Trafalgar Place
Brighton
BN1 4DW

T 0845 600 0707

F 0870 241 1144

E customersupport@thepensionsregulator.gov.uk

www.thepensionsregulator.gov.uk

www.trusteetoolkit.com

Deddf Rhyddid Gwybodaeth 2000

© Y Rheolydd Pensiynau Gorffennaf 2013

Gallwch atgynhyrchu'r testun yn y cyhoeddiad hwn cyn belled â'ch bod yn dyfynnu enw Y Rheolydd Pensiynau a theitl y cyhoeddiad. Cysylltwch â ni os oes gennych unrhyw gwestiynau ynglŷn â'r cyhoeddiad hwn. Gallwn ei chynhyrchu ar ffurf Braille, print bras neu ar dâp sain. Gallwn hefyd ei chynhyrchu mewn ieithoedd eraill.

Y Rheoleiddiwr
Pensiynau